

**Es
bruucht
Farb!**



grindet 1975

Fasnacht 2009

Blaggedde 2009



E bsundre Farbflägg – e Spezialiteet
Und villicht scho glyy e Rariteet
Ebbis wo mir bruuche dien
Wo mir dääglig pflääge mien
Denn alles andre isch numme Kitsch
Drumm gänd Sorg zem Baseldytsch

Drumm:
Hee Bebbi – heschs nonig satt
Es bruucht Farb in unsrer Stadt



Unseri alt St. Jakob-Halle
Duet mängge Lytt esoo nimm gfalle
Das hett au dr Roger Brennwald gsee
Und präsentiert uns syy Idee
E Neibau muess aane, wo me wältwyt sott kenne
Dää will är Federer-Tämpel nenne

Drumm:
Hee Bebbi – heschs nonig satt
Es bruucht Farb in unsrer Stadt

**Rot-grien duet unsere Kanton dominiere
Rot duet im blau-wysse Huus logiere
Grien duet im Rothuus residiere
Und vo deert us d Stadt representiere
„Habemus Morin“ är straalt ibers ganz Gsicht
Basel quo vadis, haisst das Kapitel vo dr Gschicht**

**Drumm:
Hee Bebbi – heschs nonig satt
Es bruucht Farb in unsrer Stadt**





Bangge fusioniere, verlieren ihr Gäld
Milliarde-Verluscht uff dr ganze Wält
Stelle wärde gschtriche, Zinse gsänggt
Do hänn e paar Top-Manätscher dänggt
sie dien ai Mool uff ihr Sagggäld verzichte
Und scho kenne d Meedie Positivs bricht

Drumm:

Hee Bebbi – heschs nonig satt
Es bruucht Farb in unsrer Stadt

D Mäss wird greesser, will expandiere
Um d Luxus-Mässe nit z verliere
D Herbschtmäss duet me usenanderrysse
uns um Farbe, Dift und Gschmäggli bschysse
Hyysen mit Tradizioon – mir findes myys
Verschwinde aifach – das isch dr Bryys

Drumm:
Hee Bebbi – heschs nonig satt
Es bruucht Farb in unsrer Stadt





S git e Gattig Lytt us Ziri und Bärn
Die gseen mir im Joggeli gar nit gärn
Die wo Rauchbombe zinde und Faggle schiesse
Statt, dass si tolli Mätsch dien gniesse
Worum luegt dr SFV zue und duet so lang warte
Gännd deene doch ändlig die roti Karte

Drumm:
Hee Bebbi – heschs nonig satt
Es bruucht Farb in unsrer Stadt

Schöne



Waa

bloos er



gis



Dr Costanzo isch doo, derfir fählt dr Zanni
Dr Abraham, Marque und dr Hodel die han i
Dr Derdyok goot – dr Stocker muess passe
Au dr Huggel fäält – dä isch grad am Jasse
So muess dr Gross fascht dääglicg dängge
Wie soll är uns so s näggscht Double schängge?

Drumm:

Hee Bebbi – heschs nonig satt
Es bruucht Farb in unsrer Stadt

Zwai Daag im Joor steen si parat
Z'Mitts uff dr Strooss, so ganz akkurat
In dunggle Mäntel – d'Heerre mit Huet
Si griesse und lächle – si finde sich guet
S wird qualifiziert, benootet, notiert
Do kasch di jetzt frooge, wär isch dr laggier?

Drumm:
Hee Bebbi – heschs nonig satt
Es bruucht Farb in unsrer Stadt



Wird in de Baize s Rauche verbotte
Sinn d'Raucher, wo nimme rauche sotte
Verletzt in Ehr und andre Gfyyhl
Si dängge, es längi – es syg jetzte z'vyyl
Die verrauchte Glaider wurde denn fääle
Und an de Wänd denn sicher au s Gääle

Drumm
Hee Bebbi – heschs nonig satt
Es bruucht Farb in unsrer Stadt





Stadtplaanig isch e difisyli Sach
Sait d Barbara Schneider und die isch vom Fach
Drumm duet si au grad – he nundefaane
Plätz und Stroosse sälber plaane
Jetzt isch es halt z Basel grau und trisch
Gäll Hampe – machsch nit dr glyychi Mischt

Drumm:
Hee Bebbi – heschs nonig satt
Es bruucht Farb in unsrer Stadt

Z'Basel an mym Rhy



1. Z'Ba - sel an mym Rhy, jo, dört möcht i si!

Weihit nit d'Luft so mild und lau, und der Himmel isch so blau

an mym lie - be, an mym lie - be Rhy!

(2.)

**Uf der Basler Pfalz
Allne Lüte gfallt's.**

O, wie wechsle Berg und Tal,
Land und Wasser überall
Vor der Basler Pfalz!

(3.)

**Uf der breite Brugg
Für si hi und zrugg,**
Nai, was sieht me Here stoh,
Nai, was sieht me Jumpfere goh
Uf der Basler Brugg.

(4.)

**Fasnacht an mym Rhy
Und mir sinn derby
Johr fir Johr am Waagebau
Zeedel, Goschdyym sinn e Schau
Basler Fasnacht und mir sinn derby.**

(5.)

**Wottsch e bsund're Raiz
Gohsch zOobe in e Baiz
Mir intrigiere queer dur dStadt
E mängge Bebbi findets glatt
Schineblooser, jo das macht i sy.**

Mer dangge:

- Drugg: Krebs AG sit 34 Jahr drugge si di scheenschte Zeedel vo uns.
- fir Gstaltig Siwu
- Inapa Schweiz AG fir das tolle Babbyr.
- Grollimund AG fir's scheene Binde.
- Susy und Esthy fir die fyne Pointe.
- im Larvemacher Romy
- Schlegel Co AG fir die bunte Steffli.
- de Schnidere Angela und Daniela,
de Haut-Couture vo Basel.



Druckerei



Krebs AG

St. Alban-Vorstadt 56
4052 Basel

SCHINEBLOOSER WAGGIS



grindet 1975



Das ischs Fasnachtsheftli Nr. 2
Nr. 3 erschynt am 22.2.2010